

В ПОНЕДЕЛЬНИК СЫРНЫЙ ВЕЧЕРА.

На Господи воззвах, поем яко обычно, стихиры Осмогласника 3: и Миней настоящего святого 3. Слава, и ныне, Богородичен.

На стиховне самогласен, дважды. Глас 8:

Постом очиститися потщимся, * от скверны прегрешений наших, * и милостию и человеколюбием к нищим, * внити в чертог Жениха Христа, * подающего нам велию милость.

И глаголем обычныя стихи, якоже вчера.

Мученичен: Мученицы Господни, * молитесь Бога нашего, * и испросите душам нашим множество щедрот, * и очищение многих прегрешений, * молимся.

Слава, и ныне, Богородичен:

Преславную и Пречистую Богородицу, * истинную яко Матерь Божию, * воспоим благочестно, * радоватися Той глаголюще яко ангел: * радуйся Мати святая воплощенного Сына Божия. * Радуйся жилище Святого Духа, * молящая присно о нас, * во еже спастися душам нашим.

И прочее последование.

ВО ВТОРНИК СЫРНЫЙ НА УТРЕНИ.

На **Бог** Господь, тропарь святому, дважды. Слава, и ныне, Богородичен по гласу.

По 1-м стихословии седален Осмогласника.

По 2-м стихословии седален, глас 8.

Подобен: Премудрость, и Слово:

Преблагий Слове, * со Отцем и Духом создавый видимая * вкупе и невидимая, * неизреченною мудростию Твоею, * светлаго поста время прейти, * в мире глубоче благоволи благоутробне, * разрешая прелесть горькаго греха, * подая умиление и исцелений слезы, * и прегрешений прощение, * да несумненной душею, * усердным духом постящися, * со ангелы поем державу Твою.

Слава, тойже.

И ныне, Богородичен:

Премудрость и Слово в Твоем чреве, * зачепшая неизреченно Мати Божия, * миру родила еси мир Содержащаго, * и на объятиях держала еси вся объемлющаго * Пищедателя всех и Создателя, и Господа, * темже молю Тя Всепетая Дево, * и верою славлю Тя, * избавитися прегрешений моих, * егда имам предстати пред лицом Создателя моего, * Владычице Дево Чистая, * Твою помощь тогда ми даруй: * ибо можеша, елика хоцеша Всенепорочная.

Чтем же и Великаго Василиа слово о благодарении. Таже псалом 50. Каноны поем Осмогласника и Минеи, якоже в понедельник указася: такожде и в прочее последуй.

И трипеснец господина Иосифа. Глас 3.

Песнь 2.

Ирмос: Яко туча на тростот, * и яко иней на сено, * да снидут на землю, * глаголи мои.

Яко утро возсия нам, покаяния зари, преддверия светло воздержания.

Тьмы мя избави Христе внешняя, множеством милости Твоея, яко един милостив.

Огня мя исхити, и червия Спасе неусыпающаго, покаяния прилежанием очищенна.

Богородичен: Дево Всепетая, буди нам путь покаяния, ко спасения ведущий дверем.

Ин.

Ирмос, глас 2: **В**немлите людие * Мои закону Моему, * приклоните ухо ваше во глаголы уст Моих: * яко имя Твое * Господи, призвах.

Время покаяния наста, потщимся христороубцы очиститися всех прегрешений, и явитися Владыце блаженни.

Пост чистый, безгрешный потщимся совершити ныне непрестанно, да обрящем прегрешений оставление.

Еси бо Христе Многомилостив всех Блаже, присно приемляй в покаяние: темже вси Тя присно славим.

Слава, Троицен: Троицу во Единице прославим, несекомуую, неслиянну, нераздельну Существом, раздельна же Лицы Бога.

Богородичен: Чистая Дево Мати, умоли, Егоже воплотила еси яко Человека Дево, и Слова: да спасет от бед рабы Твоя.

Ирмос: **В**немлите людие * Мои закону Моему, * приклоните ухо ваше во глаголы уст Моих: * яко имя Твое * Господи, призвах.

Песнь 8.

Ирмос: Из безначальна Отца рожденнаго ...,

Раскаяния время, покаяния показати плоды достойны Богу, душе моя потщися, востани, и возопий прилежно, в пощениих и молитвах: пойте, благословите и превозносите Христа во веки.

Предочистим братие душевная чувства, и Господеви ныне прилепимся образы умиления, вопиюще чисте покаянием чистым: пойте, благословите и превозносите Христа во веки.

Уловляющаго врага ласкосердыми воспоминаньми, и невоздержанием сласти краткия паляща чувство, умертвити потщимся прилежною молитвою, поюще, благословяще и превозносяще Христа во веки.

Богородичен: Онебесившая наше земное Отроковице смешение, оледевшую и истлевшую души моя бразду, тучами Твоих щедрот, плодоносну добродетельми покажи вопиющу, и превозносящу Христа во веки.

Ин.

Ирмос: **В** купине Моисею Девы чудо, * на Синайстей горе, * прообразившаго иногда, * пойте, благословите и превозносите * во вся веки.

Предочистимся ныне, не брашны токмо, но и деяньми, и начнем вернии теплым помышлением: да Создателю светли явимся во веки.

Сице нам постится подобает, не во вражде и брани, не в зависти и рвении, не во тщеславии и лести сокровенней, но якоже Христос, в смиренномудрии.

Милующии, рече нищия, Спасу взаим дают разумно. О радости неуподобимья! подает бо богато воздаяния добрых, во вся веки.

Благословим Отца, и Сына, и Святаго Духа, Господа.

Троицен: Слава Отцу, и Сыну, и Святому Духу: един бо Бог, три. Со ангелы непрестанно человецы восхваляем Тя, Всесвятая Троице: во вся веки.

Богородичен: Радуйся Дево Чистая Богородице Марие, очистилище мира, православных рог, моли избавитися от негасимаго огня, Тя славословящим во вся веки.

Хвалим, благословим, покланяемся Господеви:

Ирмос: **В** купине Моисею Девы чудо, * на Синайстей горе, * прообразившаго иногда, * пойте, благословите и превозносите * во вся веки.

Песнь 9.

Ирмос: Тебе неопалимую купину ...,

Отверзи нам милости Твоя пречистыя утробы, покаяние человеком во спасение даровавый едине Спасе Многомилостиве.

Увы мне, кое страшное оное неумытное судилище, на немже имамы назитворити слово, ихже в житии зле содеяхом?

Одожди нам благоутробия Благодетелю каплю, потопляющую нашу скверну всю, вины покаяния нам подавая.

Вси усердным сердцем, в святого поста преддверия светло совшедше, благодарственные песни Христу принесем.

Богородичен: Тя крепкую предстательницу, и известную надежду, воспевающе благочестно, молим: Сына Твоего моли Дево спастися нам.

Ин.

Ирмос: Девство Твое Богородице Нескверная, * еже не опали огонь Божественный, * величаем.

Ныне предпочистимся в посте и слезах, и в велиих исправлениях, да обрящем велию милость.

Ныне подражаем мудрыя девы христороубцы, и потщимся Христа усрести со свещами светлыми.

Ныне подражаем Илию постившася, и бежавша от лукавья Иезавели, да тако вознесемся от земли.

Слава, Троицен: Святой, Святой, Святой, Трисвятой, Отче Вседержителю, и Сыне Единосущне со Духом, едино Божество.

Богородичен: О Тебе хвалимся, и к Тебе прибегаем, Чистая, Приснодево Честная, мучения избави вся ны.

Ирмос: Девство Твое Богородице Нескверная, * еже не опали огонь Божественный, * величаем.

На стиховне стихира самогласна, глас 3:

Любезно людие пост облобызаим: * приспе бо духовных подвигов начало: * оставим телесное сладострастие, * возрастим душевныя дарования, * спостраждем яко раби Христови, * да и прославимся яко чада Божия, * и Дух Святой в нас вселься, * просветит души наша.

Стих: Исполнимся завтра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Любезно людие пост облобызаим: * приспе бо духовных подвигов начало: * оставим телесное сладострастие, * возрастим душевныя дарования, * спостраждем яко раби Христови, * да и прославимся яко чада Божия, * и Дух Святой в нас вселься, * просветит души наша.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.

Мученичен: Царей и мучителей страх отринуша Христовы воины, * и благодарзновенно, * и мужественно Того исповедаша, * всех Господа Бога, * и Царя нашего: * и молятся о душах наших.

Слава, и ныне, Богородичен:

Богородице, предстательство всех молящихся, * на Тебе надеемся, * и Тобою хвалимся, * в Тебе все упование наше есть. * Моли из Тебе Родившагося о непотребных рабех Твоих.